

REZOLUTË
PËR VLERËSIMIN E VEPRIMTARISË SË KONTROLLIT TË LARTË
TË SHTETIT PËR VITIN 2010

Kuvendi i Shqipërisë,

Duke u nisur nga misioni i Kontrollit të Lartë të Shtetit për ushtrimin e kontrollit në subjektet dhe programet publike, për t'i siguruar Kuvendit, grupeve të interesit dhe publikut të gjerë informacion mbi përdorimin e fondeve publike;

Duke njohur vizionin e këtij institucioni për ushtrimin e kontrollit të pavarur, objektiv, të sigurt e të besueshëm mbi subjektet që përdorin fonde publike;

Duke u mbështetur në detyrimet kushtetuese e ligjore, si dhe në objektivat afatmesëm e ata vjetorë të institucionit;

Konstaton se gjatë vitit 2010 Kontrolli i Lartë i Shtetit:

- Ka realizuar objektivat e veprimtarisë kontrolluese, duke e shtrirë atë në një numër më të madh subjektsh e veprimtarish;

- Ka rritur cilësinë dhe efektivitetin e veprimtarisë kontrolluese, duke zbatuar me korrektësi rregullat ligjore e nënligjore për kontrollin e cilësisë dhe sistemin e sigurimit të cilësisë;

- Në kontrollet e ushtruara, ka zbatuar e zhvilluar një metodologji bashkëkohore, bazuar në standardet ndërkombëtare të kontrollit, standardet e nxjerra nga institucioni në zbatim të tyre dhe praktikat më të mira të vendeve të tjera;

- Në auditimet financiare, i ka dhënë përparësi vlerësimit dhe përcaktimit të riskut, kurse në auditimet e performancës u ka dhënë përparësi subjekteve e problematikave që lidhen me sektorë të ndryshëm të ekonomisë;

- Ka përmirësuar ndjeshëm veprimtarinë për kontrollin e zbatimit të legjislacionit, evidentimin e hapësirave apo mospërputhjeve të mundshme, duke rritur cilësinë e propozimeve për ndryshime e përmirësime të dispozitave ligjore;

- Ka rekomanduar arkëtimin në Buxhetin e Shtetit të dëmit ekonomik të konstatuar gjatë kontrolleve;

- Ka rritur dobinë e kontrolleve dhe cilësinë e rekomandimeve ndaj personave e subjekteve që kanë kryer shkelje ligjore, duke sjellë rritjen e nivelit të zbatimit të rekomandimeve për masa organizative, administrative e disiplinore;

- Ka përdorur fondet buxhetore, në përputhje me kuotat e planifikuara, sipas zërave të buxhetit;

- Ka kryer rregullisht trajnimin e punonjësve të institucionit;

- Ka mbajtur marrëdhënie bashkëpunimi institucionale e rezultative me institucionet kombëtare e ndërkombëtare; ka rritur transparencën e komunikimit ndaj Kuvendit, medias dhe gjithë opinionit publik.

Kuvendi kërkon që, për vitin 2011, Kontrolli i Lartë i Shtetit të thellojë më tej përvojën në këto drejtime:

- Përdorimin më gjerësisht të metodologjisë bashkëkohore të kontrollit, mbështetur në standardet ndërkombëtare e praktikat më të mira të vendeve të tjera;

- Zhvillimin e burimeve njerëzore, me synim rritjen e kapaciteteve profesionale të stafit administrativ, veçanërisht të atij kontrollues;

- Rritjen e cilësisë në kontrollin e përdorimit të fondeve të Buxhetit të Shtetit, fondeve të projekteve të financuara nga BE-ja e nga institucionet financiare ndërkombëtare;

- Zhvillimin e teknologjisë së informacionit dhe intensifikimin e trajnimit të punonjësve;

- Harmonizimin e veprimtarisë audituese të kontrollit të jashtëm me atë të brendshëm dhe

rritjen e rolit mbikëqyrës ndaj strukturave të auditimit të brendshëm;

- Konsolidimin e bashkëpunimit me Kuvendin dhe Këshillin e Ministrave për përmirësimin e akteve ligjore e nënligjore, veçanërisht të ligjit për Kontrollin e Lartë të Shtetit, përmirësimin e administrimit të vlerave materiale e monetare dhe rritjen e shkallës së zbatimit të rekomandimeve të institucionit;

- Rritjen e bashkëpunimit me organet e drejtësisë për shlyerjen e dëmeve dhe ndëshkimin e personave përgjegjës.

2 qershor 2011

KRYETARE
Jozefina Topalli (Çoba)